

Naartunermi, erninermi meeravissiarternmilu sulinngiffeqartarneq pillugu Inatsisartut inatsisaata allanngortinneratigut inuit qitornaminnik, aappaminnik inooqatigisaminnilluunniit toqukkut annaasaqarsimatillugit qaammatit pingasut angullugit aningaasaateqarfimmit akiliunneqarlutik sulinngiffeqarsinnaanissaat anguniarlugu Naalakkersuisut peqquneqarnissaannik Inatsisartut aalajangiiffissaattut siunnersuut. Allanguut UPA2025-mi naammassereersimassaaq.

(Inatsisartunut ilaasortaq, Peter Olsen, Inuit Ataqatigiit)

Akissuteqaat

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq)

Siullermeerinnineq

Naalakkersuisut annertuumik tapersersugaannut siunnersuummut pitsaasumut qujassuteqarput. Inuiaqatigiittut ileqqorissaartutut pisussaaffeqarpugut innuttaasugut artornartorsiorfianni illersussallugit tapersersussallugillu.

Ulloq 1. juli 2020-mi erninermi aningaasaateqarfik pilersinneqarpoq. Ulloq taanna Naalakkersuisut tulluusimaarlutik kingumut qiviartarpaat. Atorfeqartoq ilaqaqalerpat imaluunniit ilaqutariit allamik ataatsimik ilaneqarpata, sulisitsisut sulisartullu pisinnaatitaaffiinik pitsanngorsaanermut alloriarneq pingaaruteqartutut ullup malunnartippaa. Peqatigalugu ukiut qulit sinnerlugit sulinerup naammassineqarnera aamma ullup malunnartippaa.

Suliffeqarnermut suliassaqarfimmi aningaasaateqarfimmik pilersitsineq suliaavoq oqitsuinnaanngitsoq. Suliffeqarnermi peqataasunik isumaqatiginninniarnit amerlasuut sivisuullu ingerlanneqarnerannik piunasaqaateqarpoq, aamma ajornartorsiutit amerlasuut paasiniaarlugit nalunaaquttap akunneri amerlasuunik sulisariaqarnermik. Aningaasaateqarfik qanoq iliorluni aningaasalersorneqassava, aamma kiap aningaasalersussavaa? Sulinnginnerup nalaani sulisut qanoq taartisiaqartinneqassappat, aamma taartisianit sulisitsisut namminneq qanoq annertutigisumik akiliisassappat? Sulinerup sivilisussusaanut, sulinngiffeqarnerup nalaani feeriamik soraarnerussutisiassanillu katersinermut atatillugu sulisut qanoq iliorluni qulakkeerneqassappat? Aningaasaateqarfik sunulluunniit attuumassuteqassanngila, imaluunniit Naalakkersuisunut Inatsisartunulluunniit atassava? Taamaattumik aningaasaateqarfimmik nutaamik ukiup ataatsip iluani pilersitsineq ajornarpoq.

Erninermut inatsit Naalakkersuisut suliarimmassuk, aamma pingaaruteqartippaat qulakkiissallugu, angajoqqaat inoorlaamik annaasaqartillugit angajoqqaat kikkulluunniit erninermi sulinngiffeqarnissartik annaassanngikkaat. Naalakkersuisut isumaqarput, inunnut aappaminnik annaasaqartut pisinnaatitaaffiinik aalajangersaanissamut erninermut inatsit inissiiffigissallugu eqqortuunngitsoq.

Inooqatigisap aapparisalluunniit toqunerani sulinngiffeqarneq pillugu isumassarsiaq naammassineqassappat, aqqissuussamik nutaamik pisariaqartitsisoqarpoq. Inatsit nutaaq aamma aningaasaateqarfik immikkoortoq.

Tamatuma saniatigut Naalakkersuisut aamma tunngaviusumik isiginnittaaseqarput, sulisartunut atugassarititat pillugit sapinngisamik annertunerpaamik suliffeqarnermi peqataasunit isumaqatiginninniarnissaq isumagineqartariaqartoq.

Naalakkersuisut isumaqarput aliasunnermi sulinngiffeqarnermik matussusiisussamik aningaasaateqarfeqarsinnaaneq suliffeqarnermi peqataasut illuatungeriit pingasut isumaqatiginninniarnannut ilaatinneqarsinnaasoq.

Aningaasaateqarfimmik inatsimillu tassunga tunngasumik nutaanik pisariaqartitsisoqarmat kiisalu Naalakkersuisut isumaqarmata, sulinngiffeqarnermut pisinnaatitaaffik suliffeqarnermut peqataasut akornanni isumaqatigiissutit aqutigalugit qulakkeerneqartussaasoq, taamaattumik Naalakkersuisut allannguutissatut siunnersuummik saqqummiussipput:

”Inatsisartunut aalajangiiffigisassatut siunnersuut: Naalakkersuisut peqquneqassasut inuit qitornaminnik, aappaminnik inoqaatigisaminnilluunniit toqukkut annaasaqarsimatillugit aningaasarsiat annaanagit sulinngiffeqarsinnaanermut aningaasateqarfiliorsinnaanermut inatsisitigut periarfissat qulaajarneqassasut Inatsissamut siunnersuusiortoqarsinnaanera siunertaralugu. Inatsisissatut periarfissat UPA 25-mi saqqumiunneqassapput. Suliami kattuffiit susassaqartut peqatigalugit suliarineqassaaq.”